

EPILOGO

"Na lugá di maldishoná e skuridat, sende un lus." Esei ta bon konseho. Talbes algun por akusá nos di maldishoná e skuridat. Manera nos a splika kaba, nos ta preokupá pa e echu ku tantu siñansa falsu ta ser presentá komo sifuera ta bèrdat, mientras nos no tin ningun manera pa haña dokumentashon pa trese e eror na klaridat. Nos ta spera ku e buki aki a presentá e dokumentashon tan nesesarío.

Maldishoná e skuridat? Nò. Eksponé e skuridat? Si.

Ma kiku di e lus? Kiku di e bèrdat? Hesus a deklará bon kla: "Ami ta e lus di mundu" (Juan 8:12). "Ami ta e kamina, i e bèrdat, i e bida; ni un hende no ta bin serka e Tata, sino pa medio di Mi" (Juan 14:6) Tambe Hesus a deklará: "Bo Palabra ta bèrdat" (Juan 17:17).

Ningun hende ta yega shelu serka Dios na final di nan bida terenal, si nan no kere Skritura santu (e bèrdat skirbí) i konfia den Kristu Hesus pa salbashon (e bèrdat bibu). Beibel ta revelá ku kada pèrsona ta nase komo pekadó i ta hasi piká. "Tur a peka i ta falta e gloria di Dios" (Romanonan 3:23). Piká ta un ofensa asina grandi kontra Dios ku E no tolerá ni e piká di mas chikitu. Konsekuentemente kada pèrsona ta destiná pa sufri eternamente na fièrnu komo kastigu pa nan piká.

No tin manera ku bo por skapa di e destino horibel aki. Hopi hende ta kere ku nan bon obranan, nan deboshon, nan religion, èts. por hasi nan aseptabel serka Dios pa nan por yega shleu. Ma en realidat, ningun religion—ni Evangéliko, ni Katóliko, ni Pentekostal, ni Protestant, ni Testigu di Jehová, ni Atventista, ni Bahai, ni Islam, ni mormonismo—NINGUN por skapa nos di e destino aki. Ningun obra di karidat: duna paña, kuminda, remedi, sèn, èts. ta sufisiente pa kompensá Dios pa bo piká kontra djE. Ningun akto di deboshon, resamentu, lesa Beibel, rosario, asistensia na misa—NADA—por skapábo for di fièrnu. Ta tempu pa stòp di konfia esakinan (i kualke otro kos ku bo ta kere por hasíbo aseptabel pa Dios). Nan no por salbábo di fièrnu.

Tin un kos so—un pèrsona—ku por skapábo, i esei ta Señor Kristu Hesus. E por pasobra E ta Dios. Den Dios Su gracia i misericòrdia pa hende, Kristu boluntariamente a tuma e kastigu ku abo i ami ta meresé. Dios a hasi Kristu, "Esun, Kende no tabata konosé piká, bira piká pa nos" (II Korintionan 5:21). E sakrifisio di Su Pèrsona si a satesfasé Dios Su rabia kontra bo piká.

Awor Dios ta ofresé pordon na kualke pèrsona ku ta despuesto pa risibié. E ta un oferta gratis; kualke hende por risibié. Pero e ta un oferta kostoso; bo tin ku stòp di konfia tur otro kos pa skapábo difièrnu i bira lomba riba piká.

Ku un desishon konsiente, atmití na Dios ku bo ta un pekadó, ku bo no por skapa kastigu eterno na fièrnu, kere ku Kristu a muri riba krus pa skapábo, anto pidiE pa pordonábo i bira Salvador i Señor di bo bida. Bo por hasi e desishon ei awor aki mes.

"Esun ku kere den e Yu tin bida etèrno; ma esun ku no obedesé e Yu lo no mira e bida, ma e furia di Dios ta keda riba djé" (Juan 3:36).